

Na osnovu člana 17. Pravilnika o kriterijima, postupku i načinu raspodjele stranih dozvola za prijevoz tereta domaćim prijevoznicima („Službeni glasnik BiH”, broj 35/ 02, 79/09 i 83/14), ministar komunikacija i prometa Bosne i Hercegovine, objavljuje

O B A V J E Š T E N J E

o pokretanju postupka raspodjele CEMT dozvola i bilateralnih godišnjih dozvola za Belgiju, Holandiju i Francusku za 2016. godinu.

Obavještavaju se prijevoznici iz Bosne i Hercegovine koji obavljaju međunarodni cestovni prijevoz tereta da Ministarstvo komunikacija i prometa BiH (u daljem tekstu: Ministarstvo), na osnovu ovlaštenja iz člana 28. stav 1. Zakona o međunarodnom i međuentitetskom cestovnom prijevozu (u daljem tekstu: Zakon), pokreće postupak za raspodjelu CEMT dozvola i bilateralnih godišnjih dozvola za Belgiju, Holandiju i Francusku za 2016. godinu.

I RASPODJELA CEMT DOZVOLA

Bosna i Hercegovina je od Sekretarijata Međunarodnog transportnog foruma za 2016. godinu dobila ukupno 1300 CEMT dozvola, od čega 1240 CEMT dozvola minimalno za vozila EKO-5 karakteristika i 60 CEMT dozvola minimalno EKO-6 karakteristika, prema slijedećem:

- **96 CEMT dozvola** koje važe za Austriju, a ne važe za Italiju i Grčku minimalno za vozila EKO-5 karakteristika (u daljem tekstu: A);
- **282 CEMT dozvola** koje važe za Italiju, a ne važe za Austriju i Grčku minimalno za vozila EKO-5 karakteristika (u daljem tekstu: I);
- **90 CEMT dozvola** koje važe za Grčku, a ne važe za Austriju i Italiju minimalno za vozila EKO-5 karakteristika (u daljem tekstu: GR);
- **772 CEMT dozvola** koje ne važe za Austriju, Italiju i Grčku minimalno za vozila EKO-5 karakteristika (u daljem tekstu: O5).
- **60 CEMT dozvola** koje ne važe za Austriju, Italiju i Grčku minimalno za vozila EKO-6 karakteristika (u daljem tekstu: O6).

Po ovom Obavještenju raspodjela CEMT dozvole za 2016. godinu vršit će se 100%, na način:

1. U prvom postupku raspodjela CEMT dozvola vršit će se 100% na sve prijevoznike nakon čega će se na web stranici Ministarstva objaviti prijedlog liste za raspodjelu CEMT dozvola po prijevoznicima kojima su dodijeljene CEMT dozvole za 2016. godinu. Nakon objavljenog prijedloga liste, prijevoznici će imati pravo prigovora Komisiji za raspodjelu CEMT dozvola za 2016. godinu (u daljem tekstu: Komisija).

2. U drugom postupku nakon obrađenih prigovora od strane Komisije, ista će objaviti preliminarnu listu na koju će prijevoznici imati pravo žalbe Ministarstvu.

3. Nakon obrađenih žalbi Ministarstvo će objaviti konačnu listu raspodjele CEMT dozvola za 2016. godinu.

II UVJETI ZA UČESTVOVANJE U POSTUPKU RASPODJELE CEMT DOZVOLA ZA 2016. GODINU

U postupku mogu učestvovati prijevoznici koji ispunjavaju slijedeće uvjete:

1. imaju licencu prijevoznika koja važi za obavljanje međunarodnog cestovnog prijevoza tereta;
2. nemaju neizmirenih obaveza po indirektnim porezima za prvih 6 mjeseci tekuće godine;
3. nemaju neizmirenih obaveza po direktnim porezima za prvih 6 mjeseci tekuće godine;
4. nemaju neizmirenih obaveza za doprinose za zdravstveno, penziono i invalidsko osiguranje za prvih 6 mjeseci tekuće godine za sve zaposlene.

NAPOMENE:

Prijevoznici koji ne dokažu da ispunjavaju bilo koji od uvjeta iz tačaka 1. do 4. ovog Poglavlja ne mogu učestvovati u postupku raspodjele CEMT dozvola za 2016. godinu.

III BLIŽI KRITERIJI ZA RASPODJELU CEMT DOZVOLA ZA 2016. GODINU

Raspodjela CEMT dozvola za 2016. godinu će se vršiti prema slijedećim bližim kriterijima:

1. Broj vozila, kvalitet voznog parka i broj zaposlenih vozača;
2. Obavljanje cestovnog prijevoza kao osnovne ili sporedne djelatnosti;
3. Pravilno korištenje CEMT i bilateralnih dozvola.

Bliži kriteriji će se bodovati na slijedeći način:

1. Broj vozila, kvalitet voznog parka i broj zaposlenih vozača

Broj bodova po osnovu broja vozila i kvaliteta voznog parka predstavlja se obrascem: $nEKO5 \times 1 + nEEV \times 1,20 + nEKO6 \times 1,50$, gdje je n – broj vozila određene kategorije.

Pri tome:

1. za dodjelu dozvola EKO-5 i EEV se uzimaju u obzir vozila minimalno EKO-5 karakteristika;
2. za dodjelu dozvola EKO-6 se uzimaju u obzir vozila EKO-6 karakteristika;
3. prijavljeno vučno/teretno vozilo bez odgovarajućeg priključnog vozila, kao i prijavljeno vučno vozilo sa priključnim kiper vozilom, računa se tako što se broj bodova za to vozilo množi sa koeficijentom 0,20, a prijavljena kiper vozila se neće uzeti u razmatranje u postupku raspodjele CEMT dozvola za 2016. godinu.

4. prijevoznik koji ima manji broj zaposlenih vozača u odnosu na prijavljena vozila računa se tako što se broj bodova za vozilo množi sa koeficijentom 0,20, a ukoliko prijevoznik ima isti ili veći broj zaposlenih vozača u odnosu na prijavljena vozila broj bodova za vozilo množi se sa koeficijentom 1.

2. Obavljanje prijevoza kao osnovne ili sporedne djelatnosti

Za prijevoznika i poslovnu jedinicu kojima je transport osnovna (pretežna) djelatnost ukupan broj bodova množi se sa koeficijentom 1, a za prijevoznika kome je transport sporedna djelatnost ukupan broj bodova množi se sa koeficijentom 0,30.

3. Pravilno korištenje CEMT i bilateralnih dozvola u 2015. godini

Prijevozniku će se ukupan broj bodova umanjiti za 5% za svaki mjesec za koji nije dostavljao pravilno popunjene izvještaje o korištenju CEMT dozvola za 2015. godinu. U obzir se uzimaju izvještaji o korištenju CEMT dozvola za 2015. godinu za period od 1.1. do 31.8.2015. godine. Ukupan broj bodova može se, po ovom kriterijumu maksimalno umanjiti do 40%.

Prijevozniku kome je oduzeta CEMT dozvola zbog nepravilnog korištenja u 2015. godini, ukoliko konačnim rješenjem nije izrečena strožija mjera, ukupan broj bodova se umanjuje za 20%.

Prijevozniku koji koristi bilateralne dozvole u skladu sa članom 6. stav 2. i članom 9. stav 1. Pravilnika o kriterijima, postupku i načinu raspodjele stranih dozvola za prijevoz tereta domaćim prijevoznicima (u daljem tekstu: Pravilnik), ukupan broj bodova povećava se za 10%.

NAPOMENE:

U skladu s članom 16. stav 2. tačka d) Pravilnika u postupku se neće uzimati u obzir vozila sa manje od 12 tona nosivosti, skupovi vozila sa manje od 16 tona nosivosti, skupovi vozila sa više od 16 tona nosivosti kod kojih vučno vozilo ima manje od 10 tona nosivosti, niti vozila namijenjena za prijevoz nafte i naftnih derivata. Pravilno korištenje CEMT dozvola u 2015. godini se utvrđuje isključivo na osnovu izvještaja o korištenju CEMT dozvola u 2015. godini koji su dostavljeni Vanjskotrgovinskoj komori Bosne i Hercegovine u skladu sa članom 24. Pravilnika.

IV RASPODJELA CEMT DOZVOLA

Raspodjela CEMT dozvola za 2016. godinu izvršit će se prema rang- listi koja će se formirati prema broju bodova dodijeljenim prema bližim kriterijima, a prema prioritetima iskazanim u zahtjevu prijevoznika, po svakoj vrsti dozvole. Pri tome, za učestvovanje u postupku dodjele predmetnih dozvola potrebno je da prijevoznik ima najmanje slijedeći broj bodova prema vrsti dozvole:

- 5,0 boda za učestvovanje u postupku dodjele CEMT dozvola A,
- 4,0 boda za učestvovanje u postupku dodjele CEMT dozvola I;
- 2,5 boda za učestvovanje u postupku dodjele CEMT dozvola GR;
- 2,0 bodova za učestvovanje u postupku dodjele CEMT dozvola O5 i O6.

NAPOMENE:

U postupku raspodjele prvo će se razmatrati prvi prioriteti svih prijevoznika koji su podnijeli zahtjeve te zatim svaki od narednih prioriteta svih prijevoznika. Ako je broj traženih CEMT dozvola koje se mogu dodijeliti primjenom gore navedenog načina bodovanja manji od broja raspoloživih CEMT dozvola, Komisija će izvršiti umanjene minimalnog broja bodova potrebnog za dodjelu određene vrste dozvola za onoliko koliko je potrebno da se izvrši raspodjela. Umanjenje će se vršiti postepeno, za 0,20 boda.

U slučaju istog broja bodova, prednost se daje prijevozniku sa većim brojem zaposlenih vozača, koji posjeduju važeće kvalifikacione kartice za vozača.

V ZAHTJEV I POTREBNA DOKUMENTACIJA

Zahtjev za dodjelu CEMT dozvola za 2016. godinu se podnosi na obrascu koji se može preuzeti sa službene internet stranice Ministarstva <http://www.mkt.gov.ba> ili u prostorijama Ministarstva, Trg BiH br. 3, Sarajevo.

Prijevoznici koji imaju potrebu za prijevozom u Rusiju, obavezni su to posebno naznačiti na svom zahtjevu za dodjelu CEMT dozvola.

Uz zahtjev za dodjelu CEMT dozvola za 2016. godinu prijevoznik mora na dan podnošenja zahtjeva priložiti original ili ovjerene kopije važećih dokumenata i to:

- 1) važeću licencu prijevoznika koja vrijedi za obavljanje međunarodnog cestovnog prijevoza tereta;
- 2) izvod iz sudskog registra kojim se dokazuje period registracije i iz kojeg se može utvrditi da su prijevoznik ili poslovna jedinica registrirane za obavljanje djelatnosti cestovnog prijevoza tereta;
- 3) obavještenje o razvrstavanju poslovnog subjekta prema djelatnosti kojim se dokazuje osnovna (pretežna) djelatnost;
- 4) uvjerenje ili potvrdu izdatu od nadležnog tijela kojom se potvrđuje da podnosilac zahtjeva nema neizmirenih obaveza po indirektnim porezima za prvih 6 mjeseci tekuće godine;
- 5) uvjerenje ili potvrdu izdatu od nadležnog tijela kojom se potvrđuje da podnosilac zahtjeva nema neizmirenih obaveza po direktnim porezima za prvih 6 mjeseci tekuće godine;
- 6) uvjerenje ili potvrdu izdatu od nadležnog tijela kojom se potvrđuje da podnosilac zahtjeva nema neizmirenih obaveza za doprinose za zdravstveno, penziono i invalidsko osiguranje za prvih 6 mjeseci tekuće godine za sve trenutno zaposlene.
- 7) dokaz da protiv prijevoznika nisu izrečene mjere zabrane utvrđene Zakonom, Pravilnikom i drugim propisima.
- 8) potvrdu o registraciji;
- 9) izvod iz licence za vozilo/ licenca za vozilo;

10) certifikat o usklađenosti sa tehničkim propisima CEMT-a za vozila, izdat od strane ovlaštenog predstavnika u Bosni i Hercegovini;

11) certifikat o usklađenosti sa tehničkim i sigurnosnim propisima CEMT-a, u skladu sa testiranim vrijednostima i sistemima kočenja, izdat od strane ovlaštenih institucija u Bosni i Hercegovini.

12) spisak zaposlenih vozača u toku godine sa dokazom o zaposlenju (ugovor o radu, Obrazac JS 3100 i kvalifikaciona kartica za vozače).

NAPOMENE:

Prijevoznici koji posjeduju licencu prijevoznika izdatu od strane Ministarstva nisu obavezni dostavljati dokumentaciju iz tačke 1. i 2. ovog Poglavlja niti dostavljati dokumentaciju kojom dokazuju tehničku sposobnost vozila za koja posjeduju važeće licence izdate od strane Ministarstva (dokumenti iz tačke 8., 9., 10., i 11. ovog Poglavlja).

Ispunjenost uvjeta koji se dokazuju dokumentima iz tačaka 1., 2., 8., 9., 10. i 11. ovog Poglavlja će se utvrditi uvidom u službenu evidenciju Ministarstva.

Prijevoznik koji ima zaključen reprogram o izmirenju obaveza po osnovu indirektnih ili direktnih poreza ili doprinosa za zdravstveno, penziono i invalidsko osiguranje, a kojim su obuhvaćene ove obaveze za prvih 6 mjeseci tekuće godine, mora dostaviti original ili ovjerenu kopiju reprograma o izmirenju obaveza kao i original ili ovjerenu kopiju uvjerenja ili potvrde nadležnog tijela da redovno izmiruje obaveze iz reprograma.

Ako prijevoznik nije dostavio obavještenje o razvrstavanju poslovnog subjekta prema djelatnosti, kao i bilo koji drugi traženi dokument ovim Obavještenjem, smatrat će se da dokumentacija nije potpuna.

Ispunjenost uvjeta Ministarstvo utvrđuje uvidom u službenu dokumentaciju i službene evidencije Ministarstva, uvidom u dostavljenu dokumentaciju uz zahtjev, te službenom provjerom kod nadležnih tijela Bosne i Hercegovine, entiteta i Brčko distrikta Bosne i Hercegovine.

Ministarstvo neće razmatrati neblagovremene zahtjeve prijevoznika, kao i zahtjeve sa nepotpunom ili netačnom dokumentacijom u skladu sa članom 19. stav 4. Pravilnika.

VI RASPODJELA BILATERALNIH GODIŠNJIH DOZVOLA

Bosna i Hercegovina, u skladu sa međunarodnim bilateralnim sporazumima, vrši raspodjelu godišnjih bilateralnih dozvola, i to:

- 1) 5 dozvola koje važe za bilateralni prijevoz između Bosne i Hercegovine i Belgije,
- 2) 15 dozvola koje važe za bilateralni prijevoz između Bosne i Hercegovine i Holandije i
- 3) 15 dozvola koje važe za bilateralni prijevoz između Bosne i Hercegovine i Francuske.

Zahtjevi za dodjelu dozvola iz tačke 1., 2. i 3. ovog Poglavlja se podnose na obrascu koji se može preuzeti sa službene internet stranice Ministarstva <http://www.mkt.gov.ba> ili u prostorijama Ministarstva, Trg BiH br. 3, Sarajevo. Prijevoznik, uz zahtjev, dostavlja i dokumentaciju propisanu u Poglavlju V ovog Obavještenja (tačka 1. do 12.).

Prijevoznik koji je, pored ovog zahtjeva, podnio zahtjev za dodjelu CEMT dozvola, ne dostavlja posebno dokumentaciju, jer će se u obzir uzeti dokumentacija dostavljena uz zahtjev za dodjelu CEMT dozvola.

Dodjela dozvola iz ovog Poglavlja vršit će se prema rang-listi, po broju bodova u skladu sa kriterijima iz tačke 1., 2. i 3. definiranim u Poglavlju III ovog Obavještenja.

VII PROVJERA PRILOŽENE DOKUMENTACIJE

Ministarstvo ima pravo provjere priložene dokumentacije putem nadležnih tijela u Bosni i Hercegovini.

VIII DOSTAVLJANJE ZAHTJEVA

Zahtjev sa traženom dokumentacijom za dodjelu CEMT dozvola za 2016. godinu i zahtjev sa traženom dokumentacijom za dodjelu bilateralnih godišnjih dozvola za Belgiju, Holandiju i Francusku za 2016. godinu podnosi se putem pošte, preporučeno, na adresu:

Ministarstvo komunikacija i prometa BiH, Trg BiH 3, 71 000 Sarajevo

«Komisija za raspodjelu CEMT dozvola za 2016. godinu- ne otvarati»

Zahtjev podliježe plaćanju administrativne takse u iznosu od 5 KM.

Krajnji rok za podnošenje zahtjeva sa traženom dokumentacijom je 29.10.2015. godine.

Sarajevo, septembar 2015. godine.

MINISTAR

Slavko Matanović